

**IZVJEŠTAJ O RADU
VIJEĆA ZA DJECU BOSNE I HERCEGOVINE
ZA PERIOD AUGUST 2021. - DECEMBAR 2023. GODINE**

Sarajevo, decembar 2023. godine

IZVJEŠTAJ O RADU VIJEĆA ZA DJECU BOSNE I HERCEGOVINE

1. UVOD

Vijeće za djecu Bosne i Hercegovine (u daljem tekstu: Vijeće za djecu) formirano je Odlukom o formiranju Vijeća za djecu Bosne i Hercegovine („Službeni glasnik Bosne i Hercegovine“, br. 4/13 i 66/19) u cilju izvršenja obaveza koje ima Bosna i Hercegovina u vezi Konvencije Ujedinjenih naroda o pravima djeteta i njena tri fakultativna protokola.

Vijeće za djecu Bosne i Hercegovine je stručno, interresorno, savjetodavno i koordinirajuće tijelo Vijeća ministara Bosne i Hercegovine, zaduženo za promociju i zaštitu prava djece u Bosne i Hercegovine, a posebno za praćenje provođenja Akcionog plana za djecu Bosne i Hercegovine.

Vijeće za djecu djeluje pri Ministarstvu za ljudska prava i izbjeglice Bosne i Hercegovine.

Na osnovu Odluke o formiranju Vijeća za djecu Bosne i Hercegovine, Vijeće ministara Bosne i Hercegovine je 11.06.2021. godine donijelo Odluku o imenovanju članova/ica Vijeća za djecu Bosne i Hercegovine („Službeni glasnik Bosne i Hercegovine“, broj 46/21) na period od četiri godine. Vijeće za djecu Bosne i Hercegovine se sastoji od 13 članova osam (8) članova iz reda državnih službenika, dva (2) člana iz reda nevladinih organizacija i tri (3) člana iz reda akademske zajednice.

Iz reda državnih službenika, Ministarstvo za ljudska prava i izbjeglice Bosne i Hercegovine imenuje dva člana, a po jednog člana imenuju: Ministarstvo civilnih poslova Bosne i Hercegovine, Ministarstvo sigurnosti Bosne i Hercegovine, Ministarstvo pravde Bosne i Hercegovine, Ministarstvo vanjskih poslova Bosne i Hercegovine, Agencija za predškolsko, osnovno i srednje obrazovanje Bosne i Hercegovine i Agencija za ravnopravnost spolova Bosne i Hercegovine. Iz reda nevladinih organizacija mreža „Snažniji glas za djecu“ imenuje dva predstavnika po entitetskoj zastupljenosti. Akademska zajednica imenuje tri člana koja se biraju putem javnog poziva.

Članovi Vijeća za djecu imenovani od strane uključenih državnih ministarstava i agencija, u skladu sa svojim nadležnostima, koordiniraju razmjenu informacija sa entitetskim ministarstvima.

Obzirom da je Vijeće za djecu u augustu 2021. godine održalo konstituirajuću sjednicu, donesen zaključak da će se prema Vijeću ministara BiH sačiniti objedinjeni Izvještaj o radu. Tokom 2023. godine imenovani članovi Vijeća za djecu ispred Ministarstva za ljudska prava i izbjeglice BiH, Ministarstva pravde BiH i Ministarstva vanjskih poslova BiH su promijenili radna mjesta i pokrenuta je procedura za izradu Odluke o izmjenama i dopunama Odluke o imenovanju Vijeća za djecu Bosne i Hercegovine. Novoimenovani članovi Vijeća za djecu Bosne i Hercegovine će sa radom početi u 2024. godini, iz tih razloga sačinjava se objedinjeni izvještaj za period august 2021. – decembar 2023. godine.

2. CILJEVI I ZADACI

Odlukom o formiranju Vijeća za djecu Bosne i Hercegovine definisane su slijedeće nadležnosti, i djelokrug rada i odgovornosti Vijeća za djecu:

- a) promocija i zaštita prava djeteta;
- b) iniciranje i aktivno učestvovanje u izradi i monitoringu strateških, planskih i akcionih dokumenata iz oblasti prava djece u Bosni i Hercegovini;
- c) uspostava saradnje i koordinacije između svih aktera uključenih u zaštitu djece i dječijih prava;
- d) izvještavanje Vijeća ministara o stanju, problemima i aktivnostima u oblasti prava djeteta u Bosni i Hercegovini;
- e) priprema izvještaja, stručnih analiza, inicijativa, preporuka i mišljenja u vezi sa konkretnim mjerama i mogućim rješenjima za dobrobit djece i zaštitu njihovih prava koja putem Ministarstva za ljudska prava dostavlja Vijeću ministara;
- f) uspostava redovne saradnje sa Odjelom za praćenje prava djeteta u okviru Institucije ombudsmena za ljudska prava Bosne i Hercegovine i Zajedničkom komisijom za ljudska prava, prava djeteta, mlade, imigraciju, izbjeglice, azil i etiku Parlamentarne skupštine Bosne i Hercegovine;
- g) uspostava saradnje i partnerstva sa domaćim i međunarodnim vladinim i nevladinim organizacijama i akademskom zajednicom koje se bave promocijom i zaštitom prava djece, kao i sudjelovanje u svim projektima koji se iniciraju u interesu djece;
- h) organizacija naučnih, stručnih i drugih konferencija, radionica, okruglih stolova, tribina, javnih predavanja, promocija, seminara, istraživačkih radova, konferencija za novinare i dr. o temama koje se odnose na prava djeteta;
- i) publikovanje rezultata istraživanja, analiza i drugih sadržaja koji se odnose na promociju i zaštitu prava djeteta;
- j) Vijeće za djecu obezbjeđuje učešće djece u planiranju aktivnosti.

3. NAČIN RADA

Način rada i odlučivanja uređen je Poslovníkom o radu Vijeća za djecu Bosne i Hercegovine. Vijeće razmatra materijale i akte iz svog djelokruga rada, podnosi razne inicijative, te donosi zaključke, preporuke i daje mišljenje o pitanjima značajnim za ostvarivanje prava djece u Bosne i Hercegovine.

Vijećem rukovodi predsjednik/ca, saziva sjednice, predlaže dnevni red, upravlja tokom sjednice, zaključuje sjednice, potpisuje zapisnik. Predsjednik/ca Vijeća ima dva zamjenika, koji ne mogu pripadati istom konstitutivnom narodu, i oni obavljaju poslove predsjednika/ce u njegovom/njenom odsustvu.

Vijeće donosi zaključke, preporuke i daje mišljenje ako se za to izjasni 2/3 članova Vijeća. Stručne, administrativne i tehničke poslove za potrebe Vijeća za djecu, do uspostavljanja odgovarajućeg Odjela za prava djeteta, obavlja Sektor za ljudska prava, a dio finansijskih poslova obavlja Sektor za opće, pravne i finansijsko-materijalne poslove Ministarstva za ljudska prava i izbjeglice Bosne i Hercegovine.

4. PREGLED OPERATIVNIH AKTIVNOSTI VIJEĆA ZA DJECU

U izvještajnom periodu održano je šest redovnih i jedna vanredna (online) sjednica Vijeća za djecu. Prva konstituirajuća sjednica Vijeća za djecu Bosne i Hercegovine je održana 31.08.2021. godine

Na osnovu nadležnosti, djelokruga rada i odgovornosti Vijeća za djecu definisanih Odlukom o formiranju Vijeća za djecu Bosne i Hercegovine dostavljamo pregled operativnih aktivnosti:

a) promocija i zaštita prava djeteta:

U cilju ispunjenja mandata praćenja zaštite prava djeteta Vijeće za djecu BiH je izdalo slijedeća saopštenja za javnost:

- 03.12.2021. godine kojim osuđuje čin vršnjačkog nasilja koje se dogodilo u Nevesinju u Osnovnoj školi „Risto Proroković“
- 20.12.2022. godine u slučaju povratka osuđenog pedofila na posao nastavnika fizičkog vaspitanja u OŠ „Grbavica“ u Sarajevu, Vijeće za djecu Bosne i Hercegovine javno upozorava da je ovaj slučaj najgrublji oblik kršenja prava djece na sigurnost i sigurno okruženje
- 31.03.2023. godine kojim najoštrije osuđuje čin vršnjačkog nasilja koje se dogodilo tokom skijaškog treninga, o čemu je putem medija bila upoznata šira društvena javnost.
- 16.06.2023. godine Vijeće za djecu je upućeno je pismo podrške premijeru Tuzlanskog kantona zbog čina maloljetničkog prestupništva u Lukavcu. U pismu je navedeno da se Vijeće za djecu stavlja u punom kapacitetu sa svojom ekspertizom na raspolaganje u cilju kreiranja programa i preporuka za djelovanje nadležnih vlasti u prevenciji nasilja kao i programa podrške djeci i porodici.

b) iniciranje i aktivno učestvovanje u izradi i monitoringu strateških, planskih i akcionih dokumenata iz oblasti prava djece u Bosni i Hercegovini;

U cilju provođenja preporuka Komiteta za prava djeteta i nepostojanja novog Akcionog plana za djecu, Vijeće za djecu je učestvovalo u pripremi Programa praćenja provođenja preporuka Komiteta za prava djeteta u Bosni i Hercegovini za period 2020-2024. koji je ministar za ljudska prava i izbjeglice BiH usvojio 20.12.2021. godine, te sačinjavanju Prvog presjeka stanja.

c) uspostava saradnje i koordinacije između svih aktera uključenih u zaštitu djece i dječijih prava;

U periodu od 13. – 15.10.2021. godine Ministarstvo za ljudska prava i izbjeglice Bosne i Hercegovine organizovalo *tematsku posjetu Vijeća Evrope* gdje su ugošćeni predstavnici Komiteta stručnjaka za Rome i putnike (ADI-ROM) na temu; „*Zakonodavstvo i politike koje se odnose na prosjačenje, sa posebnim fokusom na djecu*“. Cilj posjete je bio da se ukaže na dobre prakse iz partnerskih zemalja Belgije, Finske, Francuske i Grčke, a koja se mogu primijeniti u BiH. Tematskoj posjeti su prisustvovali i delegirani članovi ispred Vijeća za djecu BiH koji su Komitet izvjestili o saradnji, koordinaciji, rezultatima kao i problemima sa kojima se suočavaju u provođenju aktivnosti na suzbijanju prosjačenja sa posebnim fokusom na djecu.

d) izvještavanje Vijeća ministara o stanju, problemima i aktivnostima u oblasti prava djeteta u Bosni i Hercegovini;

Vijeće za djecu Bosne i Hercegovine je sačinilo svoj Izvještaj o radu za period august 2021. godina – decembar 2023. godina kojim će Vijeće ministara BiH izvijestiti o svim aktivnostima i rezultatima rada.

e) priprema izvještaja, stručnih analiza, inicijativa, preporuka i mišljenja u vezi sa konkretnim mjerama i mogućim rješenjima za dobrobit djece i zaštitu njihovih prava koja putem Ministarstva za ljudska prava dostavlja Vijeću ministara;

Vijeće je pripremalo godišnje operativne planove rada, te se bavilo i aktivnostima koje su usmjerene na provođenju preporuka Komiteta za prava djeteta, i u tom cilju je uputilo prema vladama entiteta i Distrikta i drugim nadležnim institucijama sljedeće inicijative:

- za direktnu i sveobuhvatnu primjenu Konvenciju Vijeća Evrope o zaštiti djece od seksualnog iskorištavanja i seksualne zloupotrebe (Lanzarote konvencija) u Bosni i Hercegovini Inicijativa upućena Zajedničkoj komisiji za ljudska prava Parlamentarne skupštine BiH sa slijedećim zaključcima: Zajednička komisija za ljudska prava Parlamentarne skupštine BiH traži da sve vlade svih nivoa vlasti i to: Vlada Federacije BiH, Vlada Republike Srpske, Vlada Brčko distrikata BiH i vlade svih kantona u Federaciji BiH, u roku od 30 dana od zaprimanja ovog zaključka hitno pokrenu neophodne aktivnosti za usklađivanje svih zakonskih i podzakonskih akata, a kako je navedeno u ovoj inicijativi i kako to predviđa Lanzerote konvencija.

Inicijativom se zadužuju sve nadležne vlade da u roku od godinu dana od zaprimanja ovog zaključka konačno izvrše harmonizaciju svih propisa sa odredbama Lanzarote konvencije koje su obavezujuće i to u svim relevantnim oblastima, i da o tome izvijeste Ministarstvo za ljudska prava i izbjeglice BiH i Vijeće za djecu BiH, a koje će kroz posebnu informaciju o tome, izvijestiti Vijeće ministara BiH i Parlamentarnu skupštinu BiH.

Inicijativa upućena u februaru 2023. godine i još uvijek nije uvrštena na dnevni red sjednice Zajedničke komisije za ljudska prava i od jula mjeseca nije održana nijedna više sjednica.

- Prijedlozi na Nacrt Zakona o izmjenama i dopunama KZ BD BiH

U skladu sa Obavještenjem o konsultacijama u postupku izrade Zakona o izmjenama i dopunama Krivičnog zakona Brčko distrikta Bosne i Hercegovine Vijeće za djecu Bosne i Hercegovine, savjetodavno tijelo Vijeća ministara BiH, je razmatralo navedeni nacrt zakona te usaglasilo komentare i prijedloge koji su dostavljeni Pravosudnoj komisiji Brčko distrikta BiH 08.06.2023. godine. Komentari su se odnosili na sljedeće stavke:

1. Član 1. dopuniti sa definisanjem pojma „bliska lica“.
2. Član 3. koji se odnosi na tok i prekid zastare krivičnog gonjenja dopuniti na način da se ovim članom obuhvate i krivična djela „trgovine ljudima“.
3. Iza člana 3. dodati novi stav 4. koji glasi:

„U članu 43a (Zamjena kazne zatvora) iza stava (3) dodaje se novi stav (4) koji glasi:

(4) Kazna zatvora u smislu stava (1) ovog člana izrečena za krivično djelo protiv polnog integriteta, učinjena na štetu djeteta, ne može se zamijeniti novčanom kaznom.“

5. „U članu 51. (Granice ublažavanja kazne) iza stava (2) dodaje se novi stav (3) koji glasi:

(3) Ubilažavanje kazne u smislu stava (1) ovog člana ne primjenjuje se za krivična djela: silovanje – član 200., trgovina ljudima – član 207a., trgovine djecom – član 207b, organizovane trgovine ljudima – član 207c., spolni odnos sa djetetom mlađim od 15 godina – član 207d., spolna zloupotreba djeteta starijeg od 15 godina – član 207e, kao i učiniocu koji je ranije dva ili više puta osuđivan za istovrsno krivično djelo.“

- Inicijativu Ministarstvu civilnih poslova BiH za organizovanje ministarskog sastanka na osnovu slučaja čina maloljetničkog prestupništva u osnovnoj školi u Lukavcu da se organizuje ministarski sastanak radi uključivanja prevencije maloljetničkog prestupništva u obrazovni sistem u osnovnim i srednjim školama.

Inicijativa dostavljena 15.06.2023. godine a Ministarstvo civilnih poslova dostavilo odgovor da će na jednom od narednih sastanaka delegirati temu maloljetničkog prestupništva u obrazovanju. Do današnjeg dan nije zaprimljena informacija o održanom sastanku na ovu temu.

- za izmjene i dopune Zakona o dječijoj zaštiti Brčko distrikta BiH kojom se traži da se aktuelizira pitanje kriterija za ostvarivanje i ukidanje prava na dječiji dodatak u Brčko distriktu.

Usvojena zakonska rješenja krše pravo na zaštitu najboljih interesa djece jer ista uskraćuju pravo na socijalna davanja u onim slučajevima kada djeca ne pohađaju ili vrše povredu discipline, a što je često uslovljeno zanemarivanjem ili nasiljem i zlostavljanjem te iste djece u krugu njihovih porodica, a nerijetko su djeca i žrtve trgovine ljudima. Djeca koja imaju pravo na dječiji dodatak već su pogođena siromaštvom i svim nedaćama koje siromaštvo nosi, i ta davanja u slučaju socijalne potrebe ničim ne smiju biti uslovljena.

Inicijativa je 03.07.2023. godine dostavljena Skupštini Brčko distrikta BiH i još uvijek nije usvojen Zakon o izmjeni i dopuni Zakona o dječijoj zaštiti BD BiH.

- f) uspostava redovne saradnje sa Odjelom za praćenje prava djeteta u okviru Institucije ombudsmena za ljudska prava Bosne i Hercegovine i Zajedničkom komisijom za ljudska prava, prava djeteta, mlade, imigraciju, izbjeglice, azil i etiku Parlamentarne skupštine Bosne i Hercegovine;
- g) uspostava saradnje i partnerstva sa domaćim i međunarodnim vladinim i nevladinim organizacijama i akademskom zajednicom koje se bave promocijom i zaštitom prava djece, kao i sudjelovanje u svim projektima koji se iniciraju u interesu djece;

Članovi Vijeća za djecu, predstavnici vladinog i nevladinog sektora, sudjelovali su na sastancima **Grupe za promociju prava djeteta** (21.09.2021. godine i 02.06.2022. godine). Grupom predsjedavaju naizmjenično Ministarstvo za ljudska prava i izbjeglice BiH i UNICEF, a čine je predstavnici relevantnih državnih institucija, nevladinog i međunarodnog sektora. Cilj je razmjena informacija u vezi postignuća na promociji i zaštiti prava djece u Bosni i Hercegovini.

Specifični cilj je jačanje partnerstva, izbjegavanje dupliranja aktivnosti i zajedničko djelovanje vladinog i nevladinog sektora na promociji i zaštiti prava bosanskohercegovačke djece.

- h) organizacija naučnih, stručnih i drugih konferencija, radionica, okruglih stolova, tribina, javnih predavanja, promocija, seminara, istraživačkih radova, konferencija za novinare i dr. o temama koje se odnose na prava djeteta;

U izvještajnom periodu Vijeće za djecu je organizovalo konferencije povodom obilježavanja Međunarodnog dana djeteta (20.11.):

- Okrugli stol na temu „Posljedice COVID-a u obrazovanju, kvaliteta, inkluzija i mentalno zdravlje“ 18.11.2021. godine. Cilj okruglog stola je bio ukazati na značaj primjene principa najboljeg interes djeteta u oblastima obrazovanja i mentalnog zdravlja djece, te kontinuirano jačanje sistema zaštite mentalnog zdravlja djece, roditelja, prosvjetnih i zdravstvenih radnika. Na navedenom događaju su učestvovali predstavnici institucija na svim nivoima, međunarodne i domaće nevladine organizacije i predstavnici djece i mladih.
- Konferenciju na temu "Akcije djece za pravednije zajednice" - Povezivanje tačaka - Unapređenje dječijih prava u BiH“. Cilj konferencije je bio da djeca i mladi donosiocima odluka prezentuju svoja istraživanja, probleme sa kojima se susreću radi promjena koje se tiču poboljšanja života mladih, 18.11.2022. godine. Konferenciji su prisustvovali predstavnici 16 grupa djece i mladih sa čitave teritorije Bosne i Hercegovine, članovi Vijeća za djecu i predstavnici međunarodnih i domaćih nevladinih organizacija.
- Konferencija „Pravo na život bez nasilja“, 20.11.2023. godine. Tema delegirana od strane djece koja su predstavila stanje, ključne probleme i učestale oblike nasilja s

kojima se suočavaju unutar svojih zajednica, svog doma i društva općenito. Na konferenciji su zajedno učestvovali izabrani i imenovani zvaničnici/ce sa svih nivoa zakonodavne i izvršne vlasti u cilju definisanja boljih rješenja za ovaj gorući problem s kojim se djeca suočavaju u društvu.

- i) publikovanje rezultata istraživanja, analiza i drugih sadržaja koji se odnose na promociju i zaštitu prava djeteta;

U izvještajnom periodu Vijeće za djecu Bosne i Hercegovine zbog nedostatka finansijskih i tehničkih kapaciteta nije provodilo istraživanja koja se odnose na promociju i zaštitu prava djeteta.

- j) Vijeće za djecu obezbjeđuje učešće djece u planiranju aktivnosti.

Vijeće za djecu Bosne i Hercegovine je u izvještajnom periodu održalo ***zajedničku sjednicu sa predstavnicima grupa djece i mladih u BiH***. Zajednička sjednica je bila organizovana sa ciljem unapređenja ostvarivanja dječijih prava u Bosni i Hercegovini i razmjena iskustva i informacija među profesionalcima i djecom i mladima. Na samoj sjednici, između ostalog, u ime djece i mladih u BiH predsjednici Vijeća za djecu predata ***Inicijativa djece i mladih u BiH za podršku Savjetodavnoj liniji „Plavi telefon“ i Inicijativa djece i mladih u BiH za uključivanje u redovne konsultacije sa Vijećem za djecu BiH***.

Osim predstavnika djece i mladih u BiH sjednici je prisustvovao i direktor udruženja „Nova generacija“ koji je prezentovao rad savjetodavne linije „Plavi telefon“. Razlog pokretanja usluge je što nije postojala jedinstvena savjetodavna linija preko koje su djeca i porodice mogle dobiti podršku u vidu konsultacija, savjetovanja kao i informacija o mogućnostima ostvarivanja prava iz oblasti socijalne i zdravstvene zaštite. Pored toga, veliki broj djece širom BiH, a naročito u manje razvijenim opštinama, nema pristupačne načine i priliku za dobijanje podrške i ostvarivanje kontakta sa uslugama socijalne i zdravstvene zaštite. Plavi telefon upravo to omogućava putem besplatne i anonimne linije.

Imajući u vidu potrebe djece i mladih u Bosni i Hercegovini, kao i preporuke Komiteta za Prava djece u BiH, te preporuke djece i mladih iz 20 opština u Bosni i Hercegovini Vijeće za djecu se obratilo i Ministarstvu komunikacija i prometa BiH sa ***molbom za pokretanje procedura dodjele jedinstvenog broja*** i izmjene Pravila o izmjenama pravila 38/2008 plan brojeva za telefonske usluge u Bosni i Hercegovini. Nakon čega su predstavnici Ministarstva komunikacija i prometa BiH i Regulatorne agencija za komunikacije BiH prisustvovali sjednici Vijeća za djecu gdje su detaljnije objasnili postupke dodjele brojeva na osnovu Zakona o elektronskim komunikacijama koji se usklađuje sa EU zakonodavstvom za datu oblast i Direktivom donesenoj 2018/1972 u kojima je jasno definisan način dodjele pomenutih brojeva. Pored ovoga obavješteni su da je formirana radna grupa za izradu/izmjene pomenutog zakona i predviđeni rok je četvrti kvartal 2023 za upućivanje na Vijeće ministara BiH.

5.PREGLED OSTVARENIH REZULTATA

Pregled ostvarenih rezultata u vezi pokrenutih inicijativa Vijeća za djecu bit će vidljiv kroz naredni izvještaj, koji će biti pripremljen za 2024. godinu, obzirom da je potreban određeni vremenski period za provođenje svih potrebnih aktivnosti u cilju njihove realizacije od strane nadležnih institucija.

U izvještajnom periodu Vijeće za djecu BiH je održalo **šest** redovnih i **jednu** vanrednu sjednicu sa konkretnim operativnim aktivnostima putem kojih su ostvareni slijedeći rezultati:

- Usvojen Poslovnik o radu Vijeća za djecu
- Izrađen operativni plan rada Vijeća za djecu
- Učestvovanje u izradi dokumenta „Drugo izdanje Smjernica za postupanje u slučaju nasilja nad djecom“ . Kako bi se intenzivirali procesi harmonizacije rada različitih sistema zaštite djece kada je u pitanju zaštita od nasilja u Bosni i Hercegovini te pružanje djelotvornije zaštite i usluga djeci žrtvama nasilja u skladu sa preuzetim međunarodnim standardima, u okviru drugog izdanja Smjernica za postupanje u slučajevima nasilja nad djecom u Bosni i Hercegovini, ažuriran je postojeći tekst ranijih Smjernica u dijelovima u kojima je u međuvremenu došlo do promjene propisa i novijih međunarodnih standarda. Ažuriranje Smjernica realizirano je u okviru projekta “Zaustaviti nasilje nad djecom: Prevencija i rad na sprečavanju seksualnog iskorištavanja i zlostavljanja djece u digitalnom okruženju u Bosni i Hercegovini“ koji je implementirao Konzorcij za zaštitu djece koji čine UNICEF, MFS-EMMAUS i Save the Children, te je ažuriran dio u vezi sa nasiljem u digitalnom okruženju sa novim segmentima kojim se naznačavaju novi oblici nasilja nad djecom.
- Izrađen Program praćenja provođenja preporuka Komiteta za prava djeteta u Bosni i Hercegovini za period 2020-2024.
- Obilježavanje Međunarodnog dana djeteta
- Uključivanje djece i mladih u rad Vijeća za djecu i zajedničko organizovanje različitih događaja.
- Kroz pregled operativnih aktivnosti može se zaključiti da je Vijeće za djecu ostvarilo izuzetno dobru saradnju sa nevladinim sektorom i akademskom zajednicom;
- Dobra saradnja je ostvarena sa međunarodnim organizacija koje se bave promocijom i zaštitom prava djeteta i to, prvenstveno sa UNICEF-om koji je podržao i podržava izradu indikatora za praćenje Konvencije o pravima djeteta i iznalaženja tehničkog rješenja za izvještavanje.
- Vijeće za djecu je razmotrilo inicijativu Udruženja Nova generacija iz Banja Luke u vezi stavljanja u funkciju besplatnog telefonskog broja za djecu u okviru telefonske savjetodavne linije Plavi telefon. U tom cilju Vijeće za djecu Bosne i Hercegovine je organizovalo zajedničke sastanke sa predstavnicima Ministarstva komunikacija i transporta BiH i Regulatorne agencije za komunikacije BiH, na kojem je donesen zaključak da se izradi Pravilnik o dodjeli broja za savjetodavnu liniju "Plavi telefon“.

6. TEKUĆE AKTIVNOSTI I NAREDNI ZADACI

Za period 2024. godine Vijeće za djecu Bosne i Hercegovine je definisalo sljedeće osnovne zadatke:

1. Razmatranje VII periodičnog izvještaja Bosne i Hercegovine o provođenju Konvencije o pravima djeteta;
2. Iniciranje izrade novog Akcionog plana za djecu Bosne i Hercegovine;
3. Obilježavanje Međunarodnog dana djeteta - organiziranje konferencije;
4. Organizovanje sastanaka sa Zajedničkom komisijom za ljudska prava PS Bosne i Hercegovine i Ombudsmenima Bosne i Hercegovine;
5. Iznalaženje mogućnost za certificiranje/izdavanje licenci za razvijanje gradova i opština/općina po mjeri djeteta;
6. Utvrđivanje modaliteta učešća djece/mladih u redovan rad Vijeća za djecu;
7. Pokretanje definisanje uloge medija u sistemu odgoja i obrazovanja;
8. Iniciranje aktivnosti i projekata u cilju prevencije maloljetničkog prestupništva i prisilnog prosjačenja;
9. Sačinjavanje pregleda projekata koje implementiraju NVO i akademska zajednica, a tiču se promocije i zaštite prava djeteta;
10. Priprema Izvještaj o radu za 2024. godinu;